

***Kerweredd***

***TuS***

***Olschbrigge***

***2018***

## **Olschbrigger Kerweredd 2018**

Ehr lieve Leit unn Zivilischde

Ehr gude unn ehr beese Wichte

ich fräh mich wirre uff dere Lääder se soi

mit meim bezaubernde Mundschenk unn em Gläsje woi

ich wääs das jo werklich sehr se schätze

dass ner mit mer zamme üwwer die Chaote aus em Dorf do hetze

ausserdem iss mer noch zu Ohre kumm

dass die vunn de Freilichtbühn sich net richtisch hann benumm

die hann nämlich in ehrer Redd üwwer uns gehetzt

unn e fleißischer Spion hat mer das sofort gepetzt

ich hann jo werklich lang gegrübelt

unn hanns ne Ofangs ach noch richtisch verübelt

der Zorn hat sich bei mer awwer schnell geleeh

weil ich jo wääß ,die sinn halt efach nur bleed

die hann jo noch net mo so weit gedacht

dass Olschbrigge viel speter die Kerweredd macht

unn mer genuch Zeit hann zu philosophiere

wie mer se am Beschde vor de ganze Leit blamiere

mer komme abschliesend zum Entschluss

die do owwe hann äfach e Schuss

awwer wie ner wisse hann ich bei uns genuch se tu

unn loss denne Katzwillerer jetzt mo ehr Ruh

ich heer jetzt mo uff üwwer so Kinnerkacke se schelle

unn fang mo oh mit de härtere Fälle.

Doch bevor ich jetzt enner geb zum Beschde

Will ich ershd nochemol eier Stimmcher teschde

Die Musik spielt was sinn die Leit so froh

Die Olschbrigger Kerb,Die Olschbrigger Kerb iss do!

## 1. Der Holzmichel

Ich fang mo oh mit so zwää Alde Waldhöfler Genosse  
Der Ähnt hat letschdes Johr schunn wortwörtlich de Bock abgeschosse  
Üwwer die Aktion hann sellemols viele misse lache  
Unn desjohr darf mo sei Vatter do mitmache.  
Sie wohne sich geheüwwer un gehe zamme uf die Jacht  
Unn mähne dass sich e neier Hochsitz im Revier gut macht  
Wo se die Bääm herkriehn das hann se glei gehatt  
Sie sähn im Wald äfach äm Annere paar ab  
weil so e Kettesäh macht e haufe Krach  
hannse die Dinger von Hand umgemach  
das Ganze hat halt bissje länger gebraucht  
awwer dodevor wars bei weitem net so laut  
un wie die Bääm endlich warn um  
hann se so e raulisch Strickelsche drum gebunn  
an die Ohängerkupplung unn ab Hääm  
zapzarap hann se ehr paar Bääm  
awwer kaum ware se ausem Wald empor  
hannse gemerkt sie hann ihr ganzie Ladung verlor  
der ganze Transport ging vunn vorne los  
weil der Erschde Versuch ging jo bees in die Hos  
de Änd hockt hinne drin unn tut die Bäämstämm halle  
dass die net schunn wirre runner falle  
Die Aktion hat dann ach super funktioniert  
unn korz druff sinn se Dehäm inmarschiert  
wenn ehr wisse wolle was se schlussendlich dodemit machte  
am Freitach kunnt mers noch uffem Waldhof betrachte  
die Musik spielt denne Banause voller Stolz  
„Ich un mein Holz ,Ich un mein Holz“

## 2. Der Poltergeist

Eh Junger Olschbrigger hat Desjor zum Polterabend gelad

Unn im CSG warn e ganzer Haufe Leit am Start

Vor allem sei Familie war dort gros verträät

Awwer am meischde hat sich sei Bruder druff gefräht

Nodem do unne wurd e haufe gepoltert

Sinn die ganze Buwe beim Bruder ans Auto gestolwert

Die Üwwerraschung ich kanns net annerschder sah

E Flasch Selbschgebrennter vum Opa war

Die Kerl hann vunn dem Zeisch faschd gekotzt

Sogar die Lewwer hat ordentlich gemotzt

Jeder Normale fand das Zeisch total scheisse

Nur dem Gaschtgeber sei Bruder kunnt sich net losreisse

Es enn vum Lied war voraussesah

Der Borsch war deno im Kopp nimmi ganz klar

Mit paar Leit hannse ne Hääm beweht

Unn Dehäm sofort ins Bett geleht

Wie das so iss wurd em schlecht irgendwann

Unn er iss panisch ins Bad gerannt

Eigentlich wollter kotze gehe

Awwer kunnt jo vunn allää nimmi grad stehe

Gefall isser, mim Hernkaschde uffs Scheisshaus gescheppert

Unn hat prompt die Klobrill vum Dibbe zerdebbert

Nachts hater Dehäm noch die Tut voll gebroch

Das ganze hat dann halt net grad gut geroch

Sei Freundin hat se naus uff de Balkon geschmiss

Unn dort iss die Tut dann prompt uffgeriss

De negschde Moje hat se mit ihm Schätzje gemotzt

Er hätt jo die ganz Bud unn de Balkon verkotzt

Dass er denne Balkon hat nachts gar net erreicht  
Hat se ihm Schatz erscht e Woch druff gebeicht  
Unn die Moral vunn der Geschicht  
Iss ganz äfach,wer kotzt ,der wischt!  
Die Klobrill leiht im Bad in dausende Fetze  
Ich det sah de negschde Polterowend dud der mo aussetze  
Die Musik spielt erquickend und labend  
Saufen Morgens mittags abends!

### **3. Ein Tag auf der Bank**

E Junger Kerl aus de Werschbacher Stross  
Hat Desjohr ach mo zum Angriff geblos  
Sei Freundin hat ne uff die Volksbank geschickt  
Bei dem Vorhabe wurd der Kerl total verrickt  
Hippelisch wie rer es ganze Johr iss  
Hater beim Delefoniere die Kart uff de Automat geschmiss  
Jetzt iss do allerdings so e kläner Spalt  
In denne nadeerlich die Kart nin fällt  
Mit seim Talent hater nun vorm Automat gestann  
Unn üwwerleht wie rer an die Kart kommt dran  
Vor lauter Verzweiflung isser Hääm zu seiner Frah  
Iss mit Ihr unn em Kevin wirre uff die Bank gefahr  
Die Mission war nun die Kart se berge  
Zamme mitem Schnewittche unn em vun de Zwerge  
Mit Meter unn Klebeband rücken se dere Sach zu Leibe  
Doch die dabbisch Kart will ums verrecke net droh klebe bleibe  
Sie hann noch fleisich weiter sinniert

Unn unermüdlich weiterprobiert  
E Konschtruktion aus em Meter hannse sammegebabbt  
Unn dodemit endlich die Kart geschnappt  
Unn was mer dodezu fer e Lied einfällt  
„Hey boss ich brauch mehr Geld!“

#### **4. Klarer Fall vunn Dumm geloff**

Mer hann in Olschbrigge awwer ach noch annere Leit  
Vun dene somanch Enner jedes Johr um e Plätzje do schreit  
Letschdes Johr hater Getränke transportiert  
Unn sich Desjohr annerweidisch im Dorf blamiert  
Er iss bekannt das er im Fidibs gern mo enner petzt  
Unn von dort isser Owends ach Hääm gewetzt  
Dehäm ankomm isser net unverletzt  
Er hat nämlich im volle Kopp die Stufe verschätzt  
Vor de Hausdeer hater die Stross gekisst  
So dass er schnell verbunn were misst  
Zum Glick iss prompt die Nachbarschaft kumm  
Unn hatem dabber de Knause verbunn  
Sie hann ne dann ins Bett geschafft  
Dass hat der Kerl jo awwer nimmie gerafft  
Er hat sich negschde Moje gewunnert so sehr  
Wo der Turban uff seim Kopp kommt her  
Weil er sich das selbschd nimmi kunnt erkläre  
Wollter beim Koleesch mittels Mobilfunkgerät nohheere  
awwer ach der kunntem das net sah  
weil er jo schließlich net debei war

mo gugge ob er das Negschdjohr noch toppt

es ertönt „Morgen wieder Aua im kopp“

## **5. Ein Schlag aufs Leder mit der Feder**

Eh Annerer vun denne junge Olschbrigger Granate

Tut eines owends sei Auto noch schnell warte

Die Fahrwerksfeder wollt sich net wechsele losse

Unn iss wild dorch die Werkstatt geschosse

Dorch die ganz Hall isse gezischt

Unn hat ne zu guder letschd am Kopp vewischt

Nodem die iss am Hernkaschde ingetroff

Hat der Bangert uff denne Schock erscht mo e Bier gesoff

Blutüwwerströmt hat er noch e Stick kuche dezu genoss

Unn sich dann vum Krankewah abhole geloss

Als die Sanitäter sinn endlich kumm

Guggt der Ände bleed unn der Annere dumm

Als die nämlich siehn wie ihr Patient do hockt

Warn die Buwe erscht mo korz geschockt

Sowas hann die nämlich noch nie erlääbt

Dass sich e schwer Verletzter noch üwwer Bier unn Kuche fräht

Sie hann ne schlussendlich ins Auto verfracht

Unn mit ihm de Abgang no Lautre gemacht

Do sieht mer was Sanitäter fer e Elend sehn

die Musik spielt „Schrauben drehn,Muttern drehn!“

## **6. 1. Mai Demonstration in Olschbrigge**

E paar Olschbrigger Junge hann sich am Erschde Mai versammelt  
Unn sich mittags an de Ortsausgang Richtung Herschern gegammelt  
In Herschern war Tuning Trefffe zu dere Zeit  
Unn das Kaff war jo gesperrt vun dere Ähnt Seit  
Das häst jetzt ,ich kanns eich sah  
Sinn die ganze Dicke Autos dorch Olschbrigge gefahr  
Immer mehr Zwerge hann sich dort getroff  
Es Bier iss nadeerlich ach in Ströme geloff  
Die beese Buwe wo do rum lungere  
Wollten eigentlich nur die Autos bewunnere  
Do unne hocke se , die asoziale barakeler Päns  
Das war uff de Hitt es Thema Nummer enns  
Wie mer sich am Feiertach bloß do hie hocke kann  
Hat do Owwe uffem Feschk kenner verstann  
Zwischedrin hats gehäß do wer e Ufall bassiert  
Dodebei hann sich die Jungs doch nur amüsiert  
Dass mer mit so ner Aktion fer Gesprächsstoff sorschd  
War denne awwer allegar relativ Worschd  
Die Musik spielt denne Assis wo dort hann gesass  
Bassender geht's net „Ich geb Gas,Ich will Spass“

## **7. Es Enn vumm Lied**

Ehr Leit es fräht mich dass ner so zahlreich sinn kumm  
Unn hann an meiner Kerweredd teilgenumm  
Ehr wisse jo wie jedes Johr  
Iss was ich verzehl hunnertprozentisch woahr  
unn wenn ich enner ausgeh kriegh vunn meine Protagonischde  
derfe se mer gern ach üwwer die Woahrhet berichte  
ich derf net vergesse denne Strauss se daafe  
der arm Kerl brauch jo schliesslich ach e Name  
ich hann werklich lang sinniert  
unn üwwerleht wer sich am meischde hat blamiert  
unn hab dann irgendwann efach erkannt  
de Strauss wird Desjohr mo Christian genannt  
zum Abschluss dank ich alle Unnerstitzer unn Helfer vun dem Feschd  
ohne die wärs wie jedes Johr net möglich gewäscht  
unn bevor ner jetzt in de TuS oder uff de Kerweplatz laafe  
kenne ner fer e kläänie Spende noch e Kerweredd kaafe  
dodemit zeige ner dem Verein das die Arwet sich rendiert  
unn net jeder fer nix e Haufe Zeit Inveschdiert  
zum Abschluss singe mer noch ämol unn sinn froh  
„Die Olschbrigger Kerb, Die Olschbrigger Kerb iss do!